



BANDERA

Dia 21 di Januari 1976, Betico, como Consehero General di Gobierno, a nombra un comision pa cuminza organiza un concurso den Pueblo pa un diseño di bandera. Casi 700 diseño a ser manda aden. Mayoria di mucha di school a desea di mira un streya cu 4 punta y esaki pa varios motibo. E colornan dominante tabata cora, blou, blanco y geel.

E comision, cu yudanza di un experto Americano di 'The Flag Research Institute', na Boston, a dicidi pa entrega un diseño cu combinacion di e color, significacion y valor cu e participan-tenan kier a dune.

Dia 16 di Maart 1976, Parlamento a acepta e diseño cu awe ta e bandera oficial di Aruba. Dia 18 di Maart 1976, e bandera ser hisa oficialmente den Wilhelmina stadion, acompaña pa e tononan di "Aruba Dushi Tera".

Bandera di Aruba tin 4 color: geel, blou, cora y blanco. E blou ta denota e laman cu ta rondona nos isla.

E strea di 4 punto ta simboliza e posicion di Aruba den e oceano cu ta rondone. E ta simboliza e 4 direccionnan di compas, for di cual direccionnan representantenan di mas cu 40 nacion a bin Aruba y forma un comunidad. E ta mustra riba e 4 costanan di Aruba, na unda laman ta forma un barera natural. E streya ta mustra e 4 camindanan maritimo y aereo, for di unda ta emana nos economia y for di unda ta bin y regreso nos turismo y demas pilarnan di economia, manera industria y comercio.

E strea cora cu blanco ta simboliza e cariño inmenso cu cada ciudadano tin pa su isla. E ta denota tambe e color di nos industria di antaño di palo di Brazil y Cochiniya, y ta rindi homenahe na e sanger indio drama den Rooi Frances pa su libertad.

E rand blanco di e streya ta simboliza e santo sin mancha di e playanan extenso cu ta rondona e isla y a la vez e pureza di curazon di e habitantenan cu ta respeta husticia, orden y libertad.

E liñanan geel horizontal ta denota e posicion liber y aparte di Aruba den e mesun laman, sin distancia su mes di otro isla of pais.

Geel ta color di abundancia. E ta denota nos industria quimico y petrolero y di e semper bibo, aloe, cu nos comercio y turismo ta forma conhuntamente e fuente di ingreso di nos pueblo.

Tambe fuentenan di ingreso di antaño, manera oro, guamo y aloe.

E ta simboliza nos industria di butishi y di artesanía indio di siglonan pasa. Ademas, e cantidad grandi di palo y matanan cu ta florece den color geel: kibrahacha, brazil, bonchi'strena, curahou, tuturutu, aloe, wango.

E liñanan geel ta demostra e solidez y largo duracion di tal abundancia.

